

**Umno Putrajaya Sedia Juadah Berbuka Untuk Penduduk Sepanjang Ramadan  
Bernama  
Julai 30, 2011**

PUTRAJAYA, 30 Julai (Bernama) -- Umno Bahagian Putrajaya akan menganjurkan program Ma'idaturrahman atau 'hidangan pemurah' untuk penduduk Putrajaya sepanjang Ramadan ini, kata anggota Parlimen Putrajaya Datuk Seri Tengku Adnan Tengku Mansor.

Beliau berkata program itu dicadang dilaksanakan melalui dua kaedah sama ada menyediakan hidangan berbuka puasa di gerai makanan Presint 8 setiap hari atau menghantar juadah kepada penduduk mengikut blok kawasan kediaman secara bergilir-gilir sepanjang bulan puasa.

"Saya buat program ini untuk kali pertama dan berharap bahagian (Umno) lain akan buat juga seperti ini. Di gerai makanan Presint 8, kita sediakan tempat dan makanan untuk 200 hingga 250 orang.

"Sesiapa yang nak berbuka puasa boleh datang ke sini khususnya yang tidak sempat masak atau yang kurang berkemampuan," katanya kepada pemberita di sini hari ini.

Tengku Adnan berkata para dermawan yang ingin menyumbang makanan juga turut dialu-alukan berbuat demikian sebagai amal jariah sempena Ramadan.

Dalam pada itu Tengku Adnan yang juga Setiausaha Agung Umno meminta semua bahagian Umno menyahut seruan Perdana Menteri Datuk Seri Najib Tun Razak supaya mengurangkan aktiviti politik pada Ramadan ini dan menumpukan kepada program berbentuk ibadah.

Terdahulu beliau melancarkan majlis pecah tanah surau komuniti Presint 14 yang dijangka siap pertengahan tahun depan dengan kos RM1.4 juta hasil pembiayaan kerajaan dan sumbangan para penduduk.

Presiden Perbadanan Putrajaya (PPj) Tan Sri Samsudin Osman dalam ucapannya berkata surau itu adalah satu daripada projek Local Agenda 21 Putrajaya menerusi konsep "place making" dengan projek pertama iaitu surau di Presint 9B hampir siap sepenuhnya.

Katanya menerusi konsep itu, PPj akan dapat menghidupkan kembali amalan gotong royong di kalangan penduduk serta dapat memperkukuhkan hubungan dan kerjasama antara kerajaan, PPj dan masyarakat.

LA 21 merupakan program untuk membentuk perkongsian serta kesepakatan antara pihak berkuasa tempatan, masyarakat dan pihak swasta untuk merancang dan menguruskan kawasan persekitaran ke arah mencapai matlamat pembangunan mampan.

-- BERNAMA